

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: E Piti Toata i te Matahiti.

Nu. 4

Eperera 1935

Mat. 29

*O te mau parau mau atoa ra ua tiama noa ia i roto i te mau
tufaa ta te Atua i haapao no te reira, ia haapao noa na i ta'-
na iho, o te huru ia no te mau ite atoa, e ia ore ra, aita atura
ia e oraraa. B. F. 93:30, 31: B. F. S. 90:5.*

Te Mana O Te Parau Mau.

Te Parau Mau o te ofai tihi no to tatou oraraa. Te
Parau mau, o te mana ia tei faatere i te mau mea no
teie nei ao. O ta oe ra parau-tia, e ore ia e mure, e ta oe ra ture, o te
parau mau iho ia. Salamo 119:142.

E au te Parau mau i te uira; ia ite tatou i te niuniu e te
mori tei ama, ua ite ia tatou e, tei roto i taua niuniu ra te uira
te puai, e te mana o tei faaama i taua mori ra, e tei roto atoa
i taua ninniu ra te pohe mai te mea e tamata tatou i te faa-
hapa i to'na mau ture, aita râ tatou i ite i te tumu no reira

mai taua uira ra. Hoê â ia huru ia ite tatou i te *Parau mau*, ua ite tatou e, e parau mau te reira, aita râ ta te taata nei e ravea ia faataa ê atu i te tumu, ua riro ra taua mea ra ei parau mau.

Te *Parau mau*, o te avei'a ia na te varua o te taata nei, tei aratai atu ia'na na te e'a tia ia tae atu oia i te tipaeraa mau; te vahi no reira mai tatou nei; mai te mea ra e, e farii tatou i te reira ei avei'a no tatou; mai te mea aita tatou i farii i te parau mau, e riro tatou mai te taata o tei ite i te mori uira, ua haapiihia oia e, eiaha e hauti i taua mori ra, no te mea e, te vai ra te uira i roto i te niuniu e e paapaa te taata o te hauti ia'na. Eita e tia ia tatou ia hauti i te *Parau mau* e e tamata i te faariro ia'na ei mea haavare; ia tamata tatou i te reira e faahapahia mai ia tatou mai te au i te ture o te parau mau, e ia puai te faahaparaa o te ture o te uira, e a ore ra, te *Parau mau*, te pohe ia te utu'a. Eita e tia ia tamata tatou i te faatere i te pahi i nia i te fenua, no te mea e ere ia te reira i te ture *parau mau* o te pahi, e faahaparaa ia i te ture, e te utu'a no te reira e parari te pahi, ia haapao ra tatou i te ture mau o te pahi ra, e tuu ia tatou ia'na i roto i te miti e e tere maitai oia e eita e ino.

Te *Haavare*, o te hara matamua ia tei tae mai i roto i teie nei ao; ua iteahia te haavare i roto i te paraparauraa matamua i roto i te Ô i Edene. E mea paruparu roa te *haavare*, eita e tia ia'na ia tia i nia, oia ana'e, e topa oia i raro; e mea tia ia haere te *haavare* mai te nuu faehau i te huru, ia taututuru te tahi *haavare* i te tahi *haavare*, ia ore ratou ia topa-topa e ia riro ei mea aore. Te *Parau mau* ra, e tia noa ia'na ia tia noa, oia ana'e, aita e ravea no te faaore ia'na, no te mea, te *Parau mau*, o te tumu ia no te mau mea tumu no te ao nei. Ua na mua te *Parau mau* e ua na muri te taata nei i roto i teie nei ao, no te mea te *Parau mau*, o te tumu ia

no te taata nei. Te ite, e aore râ te maramarama no te parau mau, e ere ia i te mea hamanibia, e ore hoi e noaa ia hamani. B. F. 93:29.

Ia ite tatou i te *Parau mau* e ia tapea tatou i te hoê tufaa o taua *Parau mau* ra, e riro te reira tufaa ei tautururaa na tatou ia tae atu tatou i tera ao i mua. Te taata o te ite i te *Parau mau* e aita oia i haapao i te reira, e riro to'ua oraraa ei oraraa haavare e ei mea pohe. Te taata o tei ite i te *Parau mau* e tei faito maitai i ta'na mau parau, e ta'na mau ohipa ia ore roa te hoê hape e iteahia i roto, tei ia'na te tia-mâ e te oraaaa parau mau.

Eaha te *Parau mau*? Ua fatata e piti tauatini matahiti i mairi a'enei, ua ui atu Pilato ia Iesu i teie uiraa. Ua ui atu-ra Pilato ia'na, Eaha te parau mau? Ioane 18:38. e te vai noa nei â taua uiraa ma te pahono ore hia e tae roa mai i teie mahana. Ua noaa mai ia tatou nei te hoê mau tufaa no taua pahono-raa ra, eiaha te îraa o te ite no te reira uiraa. Na roto i to tatou haapaoraa i te mau tufaa *Parau mau*, tei noaa mai ia tatou nei, te faaineine nei tatou ia tatou iho no te îraa o taua ite ra. Te hanahana o te Atua o te ite ia, oia hoi te maramarama e te parau mau. B. F. 93:36

I te vahi e iteahia te *haavare* e ite atoa hia, e tatou, te peapea e te tama'i. Eita te mau ohipa e afaro mai te mea ua faaterehia na roto i te *haavare*, ma te haapao ore hia te ture o te *Parau mau*.

Mai te matamua mai â, aita roa tatou i ite i te hoê peapea tei tupu no roto mai i te parau mau. Eita roa te hoê peapea e tupu i nia i te pahi, i tua, mai te mea ua haapao maitaihia te mau ture *Parau mau* no te pahi e te moana. E ere te *Parau mau* i te ahu nehenehe, no te Sabati ana'e, ia ahu hia ra i te mau mahana atoa e tia'i.

E nahea tatou i te haapao i te *Parau mau*? E mea farii noa hia anei te reira ma te ohipa ore? Aita roa e tia ia na

reira. Ia vaere noa tatou i te fenua eita ta tatou mau huero maitai e tupu, maori râ, ia tanu tatou i te huero maitai i te vahi i vaerehia, ia tupu e ia rahi e ia faufaahia mai te tahi i te tau auhuneraa e tia'i.

I to tatou haereraa na te moana rahi, oia hoi, teie oraraa nei, e farerei tatou i te tahi mau mahana mania roa, e aita roa to tatou pahi e tere i mua, e vai noa te mau i'e ma te paruparu i te pae tira, e aita roa e hoê mata'i no te faatere ia'na, e aita ta tatou e ravea, maori ra ia tia'i e ia tiaturi i te mata'i, te hoê ture *Parau mau* o te pahi. Hoê â huru to tei hinaaro e tei tamata i te faatere i ta ratou mau ohipa na roto i te afaro e te parau tia; i te tahi mau mahana e farerei ratou i te mahana mania, e e mana'o ratou e, aita ta ratou ohipa i tere i mua e e hi'o ratou i te tahi mau taata i te faatereraa i ta ratou ohipa ma te hape, e te tia ore, e ua tere hoi, e mana'o ratou e, eaha te faufaa ia haapao e ia haere na te e'a afaro. Ia hi'opoa maitai ra tatou i teie na huru e piti nei e ite ia tatou e, te taata o tei haere na te e'a afaro, e tei haapao i te ture mai te au i te *Parau mau*, e tae atu oia i te tipaeraa mai, noa'tu i te vero e te mau ati huru rau, e e manuia te tere o te taata o te rave i te *Parau mau* ei avei'ana'na.

Ia hinaaro tatou i te tao'a tei hau i te nehenehe, e aufau tatou i te moni e au no taua tao'a ra, eiaha tatou e imi i te ravea ia noaa mai taua tao'a ra ma te moni māmâ roa e a ore ra ma te moni ore; e mea hape te reira i te ture. Eita tatou e tae i te basileia, maori ra, ia aufau tatou i te mea e au i te ture, no te parahiraa i reira. Nahea tatou i te aufau i te reira? Na roto ia i te haapaoraa i te ture *Parau mau*, e na te reira e haapee i te taine no te parahiraa i reira.

Te Mitinare ma te Reo marû.

Ua parauhia hoi te Hamonia rahi, i roto i te Fare Menemene i Roto Miti, te *Mitinare ma te reo marû*, no te mea ua roto i to'na vairaa i roto i te Fare Menemene, te haponu nei oia i te evanelia i te mau taata e rave rahi.

I te mau mahana atoa, ua haere e te haere nei te mau taata i te Fare Menemene ia faaroo i to'na reo. I te mau amuiraa atoa e haere te mau taata i reira no te faaroora i to'na reo, e i teie nei mau mahana ra, na roto i te radio, te faaroo nei te mau taata i te mau fenua atea roa i to'na reo marû, e ua fariihiia oia e te mau taata atoa.

I te matahiti 1850, ua faaroo te hoê taata baratane, o Iosepha H. Ridges to'na i'oa, i te evanelia e ua haere oia i te fenua Utaha. E tamuta teie taata, e i te matahiti 1856, i te ava'e Tenuare, ua haamata oia, e e hoê hanere e tiahapa taata, i te ohipa no te hamaniraa o teie hamonia, mai te au i te faaueraa a Birigama Youne.

Ua rave ratou i te mau iri puaatoro e rave rahi no te hamaniraa i te tapiri no te hamonia, e ua rave atoa ratou i te mau tumu paina, no nia i te fenua Utaha, ei raau no taua hamonia ra.

I te hoê mahana ua paraparau o Birigama Youne raua e te taata faatere no te pūpū himene no te Fare Menemene, e ua na ô maira o Birigama Youne e: *Aita e nehenehe ia tatou ia porohaere i te evanelia, maori ra, ua tauturuhia tatou e te reo himene, e te tia'i noa nei au i te faaotiraa o te hamonia no te himeneraa i te evanelia i roto i te aau o te mau taata.*

I roto i te ava'e Atopa, i te matahiti 1867 i faaotihia'i e

ratou taua hamonia ra, e mai reira mai â e tae roa mai i teie nei mahana ua himene noa te mau taata himene e ua faatai noa hia i nia i te hamonia te evanelia i roto i te aaui o te mau taata e rave rahi.

Ua faaapîhia e ua faarahibia te Hamonia, e i teie nei ua tae te rahiraa o te mau aui i roto i te 2,648. Ua riro te Hamonia ei *Mitinare ma te reo marû* e te nehenehe i rotopu i te mau hamonia i te ao nei,— e mai te mea ua hinaaro outou i te faaroo i teie *Mitinare ma te reo marû*, a faatano ta outou radio i nia ia K. S. L. i Roto Miti, Utaha (K. S. L. Salt Lake City, Utah) i te po sabati, i te hora ono e te afa e tae noa'tu i te hora hitu e te afa.

Papahia e Ture.

Te Varua Taata.

TUAATIRAA

Teie nei oraraa o te piti ia o te oraraa, e te vai atura te tahi i muri a'e i te tia faahouraa, ta tatou e hi'opoa i raro nei, mai te ao varua, mai te varua taata, oia hoi ua tonono mai te Atua i ta'na iho huaai mau ia parahi i roto i te tino *Tahuti*, i roto i teie nei ao: araua'e ra e pohe teie nei tino, oia hoi, e faataahia te tino e te varua. Kohe. 12.7.

E riro te tino ei repo, no reira mai oia ra, a haere tia'tu ai te Varua i te hoê vahi i haapaohia, e te Atua, ei haapiiraa e ei tiarara i te Tia-faahou-raa mai te pohe mai. Alama 40. 6-9, 11-14. O Paradaiso te i'oa o taua vahi ra; ua tae te taata eiâ i faasataurohia i reira ra, aita oia i tae atu i roto i

te basileia o te ao. Luka 23:42, 43. Ioane 29:17. Te faaite maira o Petero ia tatou nei e, ua haere te Varua o Iesu Mesia e a'o atu i te Evanelia i te mau Varua taata i tapeahia i roto i te tapearaa, o ratou aore i faaroo i te parau a te Atua i te vaha o Noa ra. I Petero 3:18-20.

Te faaite papu mai nei teie pue irava i te huru o te Varua i te area, mai te poheraa e tae noa'tu i te Tia-faahou-raa. No te aha? No te mea e taata mau â ratou, mai ia tatou atoa nei â te huru. No to ratou faaroo ore ua pohe taua nuuaa atoa ra i te tino nei, e ua tapeahia to ratou mau varua i te tapearaa i na hanere matahiti e rave rahi ra, e tae noa'tu ua aroha te Mesia ia ratou e ua haere Varua Oia e a'o atu i te Evanelia ia ratou, ia matara ratou i te tapearaa na roto i te tatarahapa, mai te au i te faaite-raa a Isaia i te pene 42:7 e te Ioane 5:25. Mai te mea, i teie nei ao ana'e te tia ia tia i tatou i te Mesia, e ati rahi ia to tatou. I Korinetia 15:16. Aue atura hoi te rahi o te tamarii a te Atua tei pohe ma te te tatarahapa ore e te ite ore hoi i te mau ture no te Evanelia.

E fatu Iesu Mesia no tei ora e no tei pohe atoa hoi, no reira Oia i haamana'o ai i taua mau varua ora i roto i te tapearaa ra. I Petero 4:6. E mana'o tia anei ia mana'o e, e mea pohe taua mau Varua taata ta Iesu i a'o atu? Aita roa, e ite to te Varua, e e tatarahapa hoi to te apoo. Eaha e tia'i ia vai poiri â te taata no teie parau. E mea pohe ore te Varua, e au ra te tino tahuti nei i te aihere ra.

To te taata nei huru i te Tia-faahou-raa.

Eaha te tia-faahou-raa? O te faatiaraa ia o te tino *Tahuti* e te Varua a riro atu ai ei tino *Varua* hanahana e te pohe ore, o te parau hia ei *Tino Varua*. I Korinetia 15:42-45. Te ite nei tatou i to tatou huru mau, o te noaa mai ia tatou,

oia hoi, te noê tino hanahana mai to Iesu Mesia, to tatou tuana. Philipi 3:20. Eiaha tatou e imi ê atu, maori râ ia Iesu Mesia ana'e ei faaiteraa papu i te huru e noaa ia tatou, no te mea, te vai atura te tau e roaa'i i te feia parau tia to'na huru. I Ioane 3.3.

E tena na, o te Varua ra, o te taata mau ia o tei parahi i roto i te *Tino tahuti* nei â, na roto râ i te Tia-faahou-raa e parahi ai taua Varua ora ra i roto i te hoê tino pohe ore. Ue tae mai tatou i roto i teie nei ao ia roaa te tino e ia pûpû atu hoi i te reira ma te viivii ore i mua i te Atua, i roto i to'na basileia hanahana. Te mea i oaoa'i te taata, o te roaaraa ia ia'ua te hoê tino. Aita to te Diabolo e tino, o to'na ia faautu'araa. Ia haru oia i te hoê tino taata ei parahiraa no'na, ua maurnuru oia, e ia tiavaruhia oia i rapae, e te *Faao-ra*, ua ani oia ia faatiahia oia ia tomo atu i roto i te nânâ puua, o tei faaite papu mai ia tatou e, ua rahi a'e to'na hinaaro i te tino puua i te tino ore, e no reira ua maurnuru tatou no te mea ua horoa mai to tatou Metua i te ra'i ra, i te tino no tatou, ia noaa te oaoa ia tatou nei.

PAPAHIA E TUFARIUA A TAHA.

E hi'oraa o Iosepha Semita No Tatou.

Ahi'o na tatou i te *Buka a Moromona* e te mau Parau matamua no te faaroo, e ite papu ia tatou e, e taata paari roa o *Iosepha Semita*, e e taata feruriraa hohonu hoi oia.

Te na ô maira te parau tuutapapa o Iosepha Semita; *Aita roa oia i haere i te mau haapiiraa*. Mai te mea aita oia i haere i te mau haapiiraa, no hea mai to'na paari? Teie te

pahonoraa, oia hoi, no te Atua mai taua paari ra e to'na ite, no te mea e, ua haapao oia i te parau i papaihia i roto i te Iakobo i te pene hoê e i te irava pae o tei na ô mai, *Te ere ra râ te hoê o outou i te ite, e ani oia i te Atua ra, o tei horoa hua mai i te maitai i te taata atoa ra, ma te patoi ore.*

Ua parauhia oia e, e taata marû, e te oaoa e te tauturu; aita roa oia e faahapa i te taata ma te tumu ore, area ra, ia tae mai te peapea, e a ore ra te parau ino, aita roa oia e tau-pupu i te faaite atu ia ratou i to ratou hape, e ere oia i te taata e mata'u noa i te faaite atu i to'na mana'o i nia i tera ohipa e i tera ohipa. Ua tapea noa oia i to'na mana'o e tae noa'tu i te taima e tae mai te hoê mana'o maitai a'e i to'na. Ia tae mai te peapea i rotopu i to'na mau taata, oia te taata matamua o te imi i te ravea ia tauturu i te mau taata.

E taata mata'u ore oia i te ohipa e te imiraa i te mau ravea ia faaoti i taua ohipa ra, e e ite tatou i to'na mata'u ore i te ohipa i te taima i faatia'i oia i te mau oire e te mau hiero e te mau fare rahi ta'na i faatia. Ua ite mau hia to'na huru i te taine a faatia'i oia i te Ekalesia mau i nia i te ao nei, e te imiraa i te mau ravea'toa ia faatia i te reira Ekalesia i rotopu i te taata nei. E ite tatou i te huru o te taata nei na roto mai i te ohipa tei ravehia e ana. Mai te au i te papairaa i roto i te Mataio i te pene bitu e i te irava hoê ahuru ma ono tei na ô mai e; *E ite outou ia ratou i to ratou hoturaa, no nia anei te vine i te tataramoa i te pafairaa mai, e te suke no nia anei i te motuu?*

Na roto i te paari e te ite o te Peropheta, ua tauturuhia a'e oia e te mau taata atoa. Ia tupu te mau fifi e te peapea, ua ite oia i te mau ravea no te faaore i te fifi e te peapea, na roto i to'na feruriraa paari: e na roto i to'na feruriraa paari ua faatia oia i te tahi mau hiero e te tahi mau fare rarahi, i titauhia e tera tau, no te faatereraa i te ohipa ta te Atua i parau mai.

Ua faatura te mau taata ia'na no to'na feruriraa paari e to'na ite i te mau ravea e ora'i to'na mau taata. Ua na ô mai te hoê Aposetolo no taua tau ra: *Mai te mea e roaa ia Iosepha te mana'o e te feruriraa o te hoê taata ia'na, i roto i te aparauraa, e farii taua taata ra i te Evanelia hou to raua taa ê ra.*

Eaha te tumu i riro ai oia ei Peropheta na te Atua? No te mea tei ia'na te huru tano no te aratairaa i te Ekalesia i te ao nei, e tei ia'na te mana ia faatere i te ohipa i horoahia mai e te Atua ra.

E homa e, e hohoa mau te oraraa o te Peropheta ra e e mea tia ia pee tatou ia'na. Mai te mea e, e pee tatou i te haerea o te Peropheta, e riro tatou ei hohoa no te mau taata i raro a'e ia tatou, e te mau taata i rapae i te Ekalesia.

Teie te mau tumu i manuia'i cia: 1^o- No te Atua mai to'na mana; 2^o- E taata marû, e te paari, e te tauturu oia; 3^o- No to'na paari, to'na marû e te tauturu, ua tiaturi mai te mau taata ia'na. No reira a faatano tatou i to tatou oraraa mai to'na te huru, e ia riro te reira ei hi'oraa e ei hohoa no te tahi mau taata êê.

Papai'a e Rui Orometua.

E te mau ture no te fenua o tei faaauhia e te Hau, mai te faatia i te parau no te tiamâ, mai te haapao i te parau-tia e te mau ohipa atoa o te au na te taata atoa, ua faatiahia ia e au; no reira te faatia nei au, te Fatu, ia outou, e i to outou mau taeae no ta'u Ekalesia, i te haapaoraa i te reira mau ture, o te ture hoi o tei faaauhia, e te Hau, no te fenua nei; e o tei au i te ture na te taata nei, o tei hau atu e o te iti mai i teie, na te ino ia i faatupu. B. F. 98: 4-8.

TE MHU PARHU API

Ua mau te taata mai te manu.

E 31 matahiti i mairi a'enei i haamata'i te taata i te mau, na roto i te reva, na nia i te pahi reva e na te hoê machine i faatere i taua pahi reva ra, e na na taeae ra o WRIGHT i faatere. I taua mahana ra ua tupu te opuaraa, a te taata mai tahito mai â, ia mau na roto i te reva mai te manu te huru.

I teie nei ra ua mau te taata nei mai te manu i te huru, no te mea i te mahana 28 no Febuare i mairi a'enei ua mau te taata ra o Clem SOHN mai te aeto te huru. Ua haere oia, na nia i te pahi reva, i te 12,000 avae i te teitei e i reira ua ou'a mai oia i rapae i te pahi reva, e ua tere noa mai oia i raro mai te manu no te mea ua tamauhia, i nia i to'na nau rima e te avae, te pererau mai to te manu te hamaniraa. Ua rave taua taata ra i te reira ohipa maere mau i mua i te aro o te mau taata e rave rahi tei faahiahia roa ia'na ra.

Ua topa te pahi reva.

I te oire ra i Madrid, Paniora, i te 6 no Mati i mairi a'eni, ua topa te hoê pahi reva i nia i te hoê fare haapiiraa tei parari. I te parariraa o te phi reva ua pohe roa te taata faatere e to'na tauturu e e vau tamarii no te haapiiraa e e piti atoa tamarii tei paparu.

E mea maere mau.

I te oire ra o Fall River, America, te vai nei te hoê tamahine iti, 10 to'na matahiti, o Alyce Jane Mc Henry to'na i'oa, tei tapuhia e te mau taote no te huriraa i to'na vairaa maa, no te mea, i to'na fanauraa hia mai ua huri to'na vairaa maa, te vahi no nia tei raro ia, e to raro tei nia ia, e te tumu oia i tapuhia'i no te huriraa i to'na vairaa maa, no te mea e, mauui roa oia ia amu i te maa. Te faaite hia ra e, e mea maitai oia i muri a'e i to'na tapuraahia.

E ati ri'ari'a mau.

I te 7 no Mati i mairi a'enei, ua tupu te hoê ati rahi ri'ari'a i te oire ra o St. George, Utah. I taua mahana ra ua haaputuputu mai te mau taa-ta e rave rahi i pihaiho i te hoê apoo i heruhia no te imiraa i te mori arahu, no te avariraa i taua apoo api ra. I te tuuraahia, i roto i taua apoo ra, te tupita no te haapariraa hopea, inaha, ua ura oioi teie tupita e haruru ihora. Na te reira harururaa i faahururu atoa hoê tane tupita tei vai i roto i te hoê fare i pihai noa iho i te apoo heruraa mori. No te puai o te haruru ua parari te mau mea'toa i reira e ua pohe roa hoê ahuru taata e e rave rahi tei paparu ino roa. Ua haaputuputu taua mau taata i reira ma te oaoa, no te mea e faufaa rahi te noaa mai na roto mai i te mori arahu, e inaha, o te pohe tei noaa mai ia ratou.

Ua teitei rii to'na ou'araa mai.

I te 7 no Mati i mairi a'enei, ua haere te taata Rutia ra o KAITANOFF, i nia te hoê pahi reva e i to'na taeraa i te teiei ra e 22.100 avae, ua ou'a mai oia i rapae i te pahi reva ma te parachute tei taamuhia i nia ia'na.

Ua na reira oia no te tamataraa i te huru o te taata i nia roa i roto i te reva; tera ta'na parau, i to'na ou'araa mai ua farerei oia i te toetoe rarahi, e i muri iho ua roohia oia i te varea taoto puai roa. I teie nei, te faa-ineine faahou nei â oia no te tamata faahouraa.

E hautiraa ri'ari'a mau.

I te oire ra o Brockton, America, ua haavâhia a'enei e 7 tamarii no te hara taparahi taata. Ua tuuhia ratou i mua i te haavâraa no te mea i to ratou hautiraa ua rave ratou i to ratou hoa iti, Edward SMITH, e ua taamu ratou ia'na i te hoê pou a tanina'i ia'na i te auahi. Ua na reira ratou no te mea ua rave ratou, ei hauti, te peu a te mau taata oviri. E hauti ino mau â no te mea ua pohe roa to ratou hoa iti.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.